


Trinnichellu

(U Trennu-Cuppulata)

di

Martinu Appinzapalu

Allegretto



(Ripete a ogni strofa ta,ta,ta! dòpu u prima, u sicondu, u terzu e u quintu versu)
(Ta, ta, ta si ripiglia in còru)

Quande tu pigli lu trenu,
Ta, ta, ta!
Trinnichellu di Fontenu,
Ta, ta, ta!
Porta puru un zanu pienu,
Ta, ta, ta!
Chi prima di junglie a portu
Si scuraghjnatu e mortu!
Ta, ta, ta!

Bastia

Fatta la to pagheria,
Ti metti in dentru in Bastia;
Ti chjudenu in scanceria.
Dici, ò tamantu vagone,
È listess'a una prigione.

Guarda cum'ell'è stugita,
Un ci passa aqua bullita,
Pare una stanza guernita;
L'hanu tinta tutt'a neru
Quand'ellu cascò l'Imperu!

Posi annant'a se banchette,
Le tròvi cusì ummulette
È quant'è pistà stacchette!
E sopr'a la chjucculera
T'hanu accesu la lumera.

En voiture s'il vous plait!
Montrez encor vos billets!
Un mancanu di toupet.
Giranu tutt'i vagoni
E contanu li muntioni.

Lupinu

La prima gara è Lupinu,
Mi sente digià lu spinu,
Pianteremu un mumintinu.
E lu trenu di piantà,
Bisognu ha di rifiatà.

Furiani

La seconda è Furiani;
Quì principianu li piani
Chi appicianu in Calviani.
Ma lu trennu furia un n'ha,
Ell'un si vòle affannà.

Biguglia

Avale simu in Biguglia,
Si u còre ti santabuglia
Mostrati di scatabuglia;
Sorti di lu to catagnu
Fala e respir' a lu stagnu!

Borgu

Ecc'a Borgu-la-Vittòria!
Rinfrescati la memòria,
Quì, si cuprinu di glòria
Li miliziani cirnesi
Paoli contru i Francesi!

Senza rombu di cannoni,
Una mane all'assimbroni,
Li vistuti di piloni
Inchjustronu prigiuneri
Ondici mila guerrieri!

Ind'un'altru serinatu,
Lu primu colpu tiratu
Fù da un prete-sullatu;
Da in pùt'a lu campanile
Tumbò un capu di fucile.

Borgu varda la Marana,
Quì, l'antica Mariana
Cu la falgia e la furlana
Ammansava l'orzi e'rani
Per li mulini Rumani.

Lucciana

Lucciana indu lu so bugnu,
A Borgu chi stende u pugnu
Torce le labbre e lu rugnu:
Chi l'un sà la lita strana
Dà Borgu contr'a Lucciana?

Per cunosce tal'e quale
L'imbaruffate immurtale
Leghj a Salvator Viale
Chi cantede le scumpiere
Chi nascinu pe un sumere.

Casamorza

Si tu vòli un bicchjerinu
Au Buffet casamuzzinu
Metti manu a lu stacchinu,
E pò fatti una sunnata
Un ci s'esce pè a jurnata!

Trinnichellu pensa e posa,
Un la truvà dispettosa.
La ragione è luminosa:
Si t'hai d'andà luntanu,
Vai bellu bellu e pianu.

Saluta manzu lu mare,
L'onde turchinete e pare
Chi macinanu e rinare
Sulcate da un magunellu
Neru cume Trinnichellu.

Sa campana lungherina
Chi spiga, a mezza marina,
È una surella latina,
Si tu un ti n'eri anc'avvistu,
Fegghja, fegghja a Monte-Cristu.

Prunelli

Ma lu trennu stende u vòlu,
Canta cume un russignòlu
E salta lu Ponte a Golu,
T'infrungna in sette tafoni
E ti lampa in Casacconi.

Distesu ind'un'alivetu
Sott'a l'òlmu chetu, chetu.
Prunelli volta u daretu
A tuttu lu Casincale
E cova d'occhj a Vignale.

Barchetta

Fila cume una sajetta
Per l'ambarscia e la puretta
E pò ti sbarca in Barchetta,
Quì di a legna castagnina
Si face la mataccina.

Barchetta dice a Campile:
Si tondu luscio e gintile,
Altu è lu to campanile,
Ralegri, da fiume in dane,
Scolca cu le to campane.